

四庫全書

史部

欽定四庫全書

史部

欽定續通志卷十三

四

主事臣尹壯圖覆勘

總校官原任侍講臣王燕緒

欽定四庫全書

欽定續通志卷廿三

唐紀廿三

穆宗

敬宗

穆宗皇帝諱恒憲宗第三子也母曰懿安皇后郭氏初

名宥封建安郡王進封遂王額彰義軍節度使元和七

年冊為皇太子改今名

吳縝曰按憲宗紀元和元年進封于延安郡王宥為遂王即穆

宗也延安建安字有誤元和七年立遂王宥為皇太子  
十五年皇太子即皇帝位以上穆宗之為皇太子也其

名宿也及本紀則詳恒新史又不載改名年月蓋新史凡諸帝在潛之日諸事多所簡略不復詳述然既為一朝之史凡人主或皇太子之名豈細故哉今乃削而不著使覽者莫見本末則難免闕文之譏也自後文武宣懿僖昭六帝在藩與本紀所載之詳皆不同又不見所改年月其失皆與穆紀同也十五年正月

庚子憲宗崩陳宏志殺吐突承璫及禮王惲閏月丙午

皇太子即皇帝位於太極殿丁未貶皇甫鎔為崖州司

戶參軍戊申始聽政辛亥以御史中丞蕭俛翰林學士

段文昌為中書侍郎同中書門下平章事詔山人柳泌

輕懷左道上惑先朝僧大通醫方不精藥術皆妄付京

兆府決杖處死丁巳以劍南東川節度使李逢吉為山  
南東道節度使以吏部侍郎王涯為劍南東川節度使  
丙寅以右神策大將軍張維清為單于大都護充振武  
麟勝節度使乙卯尊母貴妃郭氏為皇太后二月丁丑  
大赦賜文武官階爵高年粟帛二王後三恪文宣公嗣  
王公主縣主武德配享及第一等功臣家子一子官放  
沒掖庭者宣制畢于丹鳳門觀百戲丁亥如左神策軍  
觀角觝及雜戲甲午以桂管觀察使裴行立為安南都

護充本管經略使乙未以太僕卿杜式方為桂管觀察使吐蕃寇靈州三月癸卯朔贈皇太后父郭曖太傅母號國大長公主贈齊國大長公主乙巳杜叔良及吐蕃戰敗之夏五月癸卯以國用不足詔兩稅鹽酒茶稅及戶部關官除陌等錢兼諸道雜稅合送上都及留州留使諸道支用諸司使職掌人課料等錢並每貫除舊墊陌外量抽五十文庚申葬憲宗皇帝于景陵六月丁丑韓弘罷戊寅以金吾將軍李祐為夏綏銀宥節度使代李聰

以聽為朔方靈鹽節度使已卯放京兆府今歲青苗錢  
壬辰停五月敕應給用錢每貫所抽五十文仍出內庫  
錢付度支給用癸巳皇太后移居興慶宮皇帝與六宮  
侍從大合宴于南內至右軍頒賜中尉等有差自是凡  
三日一至左右軍及宸暉九仙等門觀角觝雜戲秋七  
月丙午罷誕日受賀之禮甲寅御新成永安殿觀百戲  
乙卯如安國寺觀盂蘭盆壬戌盛飾安國慈恩千福開  
業章敬寺縱吐蕃使者觀之丙寅以新成永安殿與中

宮貴主密宴以樂之嬪妃皆預丁卯令狐楚罷八月癸酉太子少傅李鄴卒甲戌安南都護桂仲武討其叛將楊清誅之乙亥賜教坊錢五千貫充息利本錢壬辰如魚藻池發神策兵二千浚魚藻池戊戌以崔植為中書侍郎同中書門下平章事九月辛丑大合樂於魚藻宮觀競渡戊申以重陽節曲宴郭釗兄弟貴戚主壻等于宣和殿戊午加裴度守司空門下侍郎同平章事李光顏李愬並同中書門下平章事李愬充昭義軍節度澤



潞磁邢洺觀察處置等使丙寅以御史大夫崔羣為武  
寧軍節度使將作監崔能為崩南節度使冬十月庚辰  
王承宗卒其弟承元以鎮趙深冀四州歸于有司壬午  
吐蕃寇涇州右神策中尉梁守謙為左右神策京西京  
北行營都監以禦之乙酉以田弘正檢校司徒兼中書  
令鎮州大都督府長史成德軍節度鎮冀深趙觀察處  
置等使以鎮冀深趙觀察度支使王承元為義成軍節  
度使以李愬為魏博節度使以劉悟為昭義軍節度使

以左金吾將軍田布為河陽三城懷孟節度使乙酉吐蕃遁十一月癸卯赦鎮趙深冀四州死罪以下己未帝由複道出城如華清宮癸亥檢校司徒兼太子少師鄭餘慶卒十二月庚辰獵于城南壬午擊鞠于右神策軍甲申獵于苑北己丑皇甫鏞卒

長慶元年春正月己亥朔朝獻于太清宮庚子享于太廟辛丑有事于南郊大赦改元賜文武官階勲爵陪位白身人勲兩轉癸卯以田布為四鎮北庭行營涇原節

度使以刑部尚書兼司農卿郭釗為河陽三城懷孟節度使以涇原節度使王潛為江陵尹荆南節度使乙巳鄜坊節度使韓瓘改名充壬戌蕭俛罷二月乙亥觀樂于麟德殿丙子觀神策諸軍雜伎巳卯劉總以盧龍軍八州歸于有司壬午段文昌罷翰林學士杜元穎同中書門下平章事以劍南西川節度使王播為刑部尚書充鹽鐵轉運使乙酉天平軍節度使馬總奏當道見管軍士三萬三千五百人從去年正月巳後情願居農者放

逃亡者不捕辛卯宴羣臣于麟德殿三月辛亥王播奏  
加江淮鹽估每斛五十文兼舊三百文癸丑以幽州盧  
龍軍節度使檢校司空同平章事劉總為檢校司徒兼  
侍中天平軍節度使以宣武軍節度使張弘靖檢校司  
空同平章事兼幽州盧龍軍節度使以鳳翔節度使李  
愿檢校司空充宣武軍節度使以邠寧節度使李光顏  
為鳳翔尹依前檢校司空平章事充鳳翔隴右節度使  
以右衛大將軍高霞寓為邠寧節度使丁巳赦盧龍軍

八州死罪以下百姓給復一年戊午封弟憬為鄺王悅  
瓊王恂沔王懌發王愔茂王怡光王協淄王憺衡王恽  
瀋王子湛為景王涵江王湊漳王溶安王瀝潁王甲子  
劉總奏請為僧賜號大覺總是夜遁去夏四月丙子以  
前天平軍節度使馬總復為天平節度使丁丑覆試禮  
部所取進士貶禮部侍郎錢徽為江州刺史中書舍人  
李宗閔為劍州刺史右補闕楊汝士為開江令辛亥造  
百尺樓于宮中壬子王播奏加茶權五十文兼舊一百

五十文六月辛未吐蕃寇青塞堡鹽州刺史李文悅敗之秋七月甲辰盧龍軍兵馬使朱克融囚其節度使張弘靖以反壬子羣臣上尊號曰文武孝德皇帝大赦賜文武官階勲爵庚申以劉悟為幽州盧龍軍節度使壬戌成德軍兵馬使王廷湊殺其節度使田弘正以反八月辛未以左金吾將軍楊元卿為四鎮北庭行軍涇原節度使壬申朱克融陷莫州癸酉王廷湊陷冀州刺史王進岌死之乙亥以前涇原節度使田布起復檢校工

部尚書兼魏州大都督府長史充魏博節度使丙子瀛  
州兵亂執其觀察使盧士玫叛附于幽州王廷湊寇深  
州丁丑詔魏博橫海昭義河東義武諸軍討之己卯以  
深州刺史牛元翼為深冀節度使己丑以裴度為幽鎮  
招撫使癸巳王廷湊寇深州圍之九月乙巳相州兵亂  
殺其刺史邢滂吐蕃請和壬子朱克融掠易州涑水遂  
城滿城癸酉田布奏出師赴貝州行營冬十月丙寅以  
王播為中書侍郎同中書門下平章事依前充鹽鐵轉

運使以裴度充鎮州四面行營都招討使左領軍衛大將軍杜叔良充深冀諸道行營節度使戊辰以牛元翼為成德軍節度使丁丑朱克融寇蔚州戊寅王廷湊寇貝州己卯易州刺史柳公濟及朱克融戰于白石嶺敗之庚辰橫海軍節度使烏重胤及王廷湊戰于饒陽敗之丙戌以杜叔良為橫海軍節度使烏重胤授檢校司徒興元尹山南西道節度使戊子太子少保李愬卒十一月甲午裴度奏破王廷湊之兵于會星鎮丙申朱克



融寇定州節度使陳楚敗之辛酉淄青牙將馬廷釜謀

逆節度使薛平討斬之

考異曰據實錄作馬廷釜舊傳作馬狼兒河南記作馬士端今

從實錄

十二月丙寅以前容州經略使留後嚴公素為容

管經略使庚午杜叔良及王廷湊戰于博野敗績丁丑

陳楚及朱克融戰于望都敗之戊寅以李光顏為忠武

軍節度使仍兼深冀行營節度使以李遜為鳳翔節度

使辛巳以神策副使楊承和為深冀行營都監押乙酉

赦朱克融以為幽州盧龍軍節度使己丑陳楚及朱克

融戰于莫州敗之

二年春正月丁酉朱克融陷弓高庚子魏博軍潰于南  
宮節度使田布自殺兵馬使史憲誠自稱留後己酉以  
憲誠為魏博節度使庚戌以德州刺史王日簡為橫海  
軍節度使壬子貶杜叔良為歸州刺史甲寅以工部尚  
書崔俊為鳳翔尹鳳翔隴右節度使庚子以充沂密觀  
察使曹華為節度使以天德軍防禦使李進誠為朔方  
靈鹽定遠城等州節度使以晉州刺史李岵為天德軍

豐州東西受降城都防禦使二月甲子赦王廷湊仍授  
成德軍節度使丙寅以牛元翼為山南東道節度使癸  
酉以鄜坊丹節度使韓充為義成軍節度使甲戌王日  
簡賜姓名李全略辛巳崔植罷以工部侍郎元稹同中  
書門下平章事癸未以李光顏為橫海軍節度使兼忠  
武軍節度深冀行營並如故以李全略為德棣等州節  
度使丙戌以兵部郎中知制誥馮宿檢校左庶子充山  
南東道節度副使權知襄州軍府事丁亥以河東節度

使裴度守司徒平章事充東都留守以前靈武節度使  
李聽為太原尹北都留守河東節度使三月乙巳武寧  
軍節度副使王智興逐其節度使崔羣丙午加朱克融  
王廷湊並檢校工部尚書壬子以新授東都留守裴度  
為淮南節度使丁巳以左丞崔從為鄜坊節度使以王  
承元為鳳翔隴右節度使戊午以裴度同中書門下平  
章事王播為淮南節度使依前兼諸道鹽鐵轉運使己  
未以王智興為武寧軍節度使以李全略復為滄州節

度使仍合滄景德棣領之李光顏還許州夏四月辛酉朔日有食之壬戌王廷秦陷深州五月壬寅邕州刺史李元宗叛奔于黃洞蠻六月癸亥宣武軍亂逐其節度使李愿牙將李承自稱留後甲子裴度元稹罷以兵部尚書李逢吉為門下侍郎同中書門下平章事丁卯以易州刺史柳公濟為義武軍節度使壬申吐蕃寇靈州秋七月丙午貶李愿為隨州刺史以鄭滑節度使韓充為宣武軍節度使汴宋毫潁觀察等使鄭滑如故

戊申李昉陷宋州丙辰充海節度使曹華及李昉戰于  
宋州敗之丁巳李光顏又敗之于尉氏八月戊辰以左  
僕射韓舉為東都留守以東都留守陳楚為河陽懷節  
度使丙子李昉伏誅癸未以前東都留守李絳為潼關  
防禦鎮國軍等使以曹華為義成軍節度使以宋州刺  
史高承簡為兗海沂密等州節度使九月戊子鎮海軍  
將王國清謀反觀察使竇易直討平之李全略殺德州  
刺史王穆以軍亂聞壬子太子少師李夷簡卒癸丑以

前河陽節度使郭釗為河中尹兼河中絳隰等州節度使冬十月壬戌韓弘守司徒兼中書戊辰以烏重胤為天平軍節度使己卯帝由複道如咸陽止於善因佛寺施僧錢百萬因獵于咸陽閏月戊子以韋綬為興元尹山南西道節度使壬辰右驍衛大將軍韓公武卒甲寅以江淮諸州旱損詔取常平義倉粟減價糴之十一月庚午皇太后幸華清宮癸酉帝如華清宮迎皇太后遂獵于驪山庚辰帝與內官擊鞠于禁中得疾十二月丁

亥放五坊鷹隼毀獵具司徒中書令韓弘卒癸巳立景  
王湛為皇太子甲午內出絹二百匹賑两市瘡殘窮人  
巳未敕在京諸司疏放繫囚巳酉以前天平軍節度使  
馬總檢校左僕射守戶部尚書癸丑降死罪以下賜文  
武常參及州府長官子為父後者勲兩轉宗子諸親一  
轉是歲初行宣明厯

三年春三月壬戌以御史中丞牛僧孺為戶部侍郎同  
中書門下平章事夏四月甲午陸州獠反五月山南東



道節度使牛元翼卒秋七月丙寅黃洞蠻陷欽州八月  
鄭滑節度使曹華卒檢校尚書右僕射戶部尚書馬總  
卒興元節度使韋綬卒帝由複道幸興慶宮至通化門  
賜山僧絹二百匹邕管奏破黃洞蠻九月壬子朔日有  
食之丙辰加劉悟同平章事冬十月己丑杜元穎罷十一  
月帝御通化門觀作毗沙門神因賜絹五百匹

四年春正月辛亥朔降死罪以下減流人一歲賜文武  
官及宗子賀正使階勲爵詔百官言事帝餌金石之藥

處士張皋上疏切諫帝悅召之求皋不獲辛未詔皇太子監國壬申皇帝崩於寢殿年三十諡曰睿聖文惠孝皇帝廟號穆宗陵曰光陵

穆宗長慶四年

敬宗皇帝諱湛穆宗長子也母曰恭僖皇后王氏長慶元年封鄂王徙封景王二年十二月穆宗因擊鞠暴得疾自是人不得聞帝起居宰相屢乞入見不報裴度三上疏請立太子而翰林學士兩省官相次皆以為言居數

日穆宗疾少間乃御繩牀見羣臣宰相李逢吉請立景  
王為皇太子四年正月穆宗崩丙子皇太子即皇帝位  
于太極殿二月辛巳朔始聽政辛卯放沒掖庭及先配  
內園宮人已亥尊皇太后為太皇太后辛丑帝始御紫  
宸殿既退如飛龍院厚賜內官以米貴出太倉粟于兩  
市賤糶之乙巳尊母王妃為皇太后丁未御中和殿擊  
毬賜教坊樂官綾絹三千五百匹戊申擊毬于飛龍院  
己酉大合樂於中和殿三月壬子大赦免京畿青苗錢

減宮禁經費罷常貢之外有進獻者庚午賜內教坊錢  
萬緡以備遊幸甲戌夏州節度使李祐奏於塞外築烏  
延宥州臨塞陰河陶子等五城以備吐蕃又以党項為  
盜於蘆子關北木瓜嶺築壘以扼其衝乙亥如教坊賜  
伶官綾三千五百匹夏四月丙申染坊匠張韶反帝如  
左神策軍韶伏誅丁酉帝還宮五月乙卯以吏部侍郎  
李程戶部侍郎判度支竇易直同中書門下平章事癸  
亥以鹽州刺史傅良弼為夏州節度使六月己卯以左

神策大將康日全為鄜坊節度使辛巳以霖雨命疏決  
京城囚壬辰以左金吾衛大將軍李愿檢校司空兼河  
中尹河中絳隰等州節度使丙申山南西道節度使裴  
度加同中書門下平章事加陳許節度使李光顏守司  
徒癸卯太保張弘靖卒秋七月辛酉疏靈州特進渠置  
營田八月中官李文德謀反伏誅乙巳宣武軍節度使韓  
充卒九月庚戌以河南尹令狐楚為宣武軍節度使戊  
午加朱克融檢校司空巳巳浙西淮南各進宣索銀粧

奩三具冬十月庚子嶺南節度使鄭權卒壬寅以鄂岳  
觀察使崔植為嶺南節度使十一月戊午黃洞蠻反與  
環王合陷陸州刺史葛維死之庚申葬穆宗皇帝于光  
陵十二月庚寅加烏重胤同平章事丁酉進封牛僧孺  
奇章郡公李程彭原郡公竇易直晉陽郡公

寶歷元年春正月辛亥有事於南郊大赦改元內官毆  
鄆縣令于丹鳳樓下乙卯牛僧孺罷三月乙巳以兵部  
尚書郭釗為劍南東川節度使壬子宴羣臣于三殿夏

四月甲戌宰相涼國公李逢吉進封鄭國公以右神策  
大將軍康志睦為平盧軍節度使癸巳羣臣上尊號曰  
文武大聖廣孝皇帝大赦死罪以下無輕重咸赦除之  
賜文武官階爵五月庚戌如魚藻宮觀競渡庚午以右  
金吾將軍李文悅為天德軍防禦使六月己丑河中節  
度使檢校司空李愿卒乙未以戶部尚書薛平檢校司  
空河中尹河中節度使秋七月癸卯以忠武軍節度使  
李光顏為太原尹北京留守以河東節度使王沛為忠

武軍節度使甲辰鹽鐵使王播進羨餘絹一百萬匹癸  
丑以右金吾衛大將軍張茂宗為充海沂密節度使已  
未詔王播造競渡船進之閏月壬辰以前河東節度使  
李聽為義成軍節度使八月戊午遣中使往湖南江南  
等道及天台山採藥以道士劉從政為光祿少卿九月  
壬午昭義節度使劉悟卒其子從諫自稱留後冬十一  
月丙申封子晉為晉王十二月辛丑以晉王晉為昭義  
軍節度副大使劉從諫起復充昭義節度留後甲子以



左僕射李絳為太子少師分司東都戊辰敕委度支往河東振武靈夏等州市耕牛分給畿內百姓

二年春正月甲戌發神策六軍穿池于禁中二月丁未以山南西道節度使裴度守司空同中書門下平章事丁卯以禮部尚書王涯為山南西道節度使三月戊寅如魚藻宮觀競渡夏四月戊戌橫海軍節度使李全略卒其子同捷反壬寅以右金吾衛大將軍高承簡為邠寧慶節度使丙午王廷湊檢校司空戊申以劉從諫為

昭義節度副大使知節度事丙辰右金吾衛大將軍高  
霞寓卒五月甲戌以涇原節度楊原卿為河陽三城懷  
州節度使以金吾衛大將軍李祐為涇原節度使戊寅  
如魚藻宮觀競渡庚辰幽州軍亂殺其節度使朱克融  
克融子延嗣自稱留後癸未遣中使押山人杜景先往  
淮南及江南嶺南諸州求訪異人甲午賜興唐觀道士  
劉從政修院錢二萬貫六月辛酉觀漁于凝碧池癸亥  
以旱命諸司䟽理繫囚甲子觀驢鞠角觝于三殿秋七

月乙亥河中進力士八人癸巳以鄆縣漢陂隸尚食禁  
民漁八月丙申以裴度判度支丙午觀競渡于新池九  
月甲戌大合宴于宣和殿陳百戲三日而罷戊寅河東  
節度使李光顏卒出內庫錢募力士盧龍軍兵馬使李  
再義殺朱延嗣自稱留後壬午李程罷冬十月乙亥以  
李再義充盧龍軍節度副大使知節度事仍賜名載義  
十一月壬申以戶部尚書胡証為嶺南節度使甲申李  
逢吉罷己丑禁朝官及方鎮置私白身十二月辛丑帝

夜獵還宮與中官劉克明田務成許文端打毬軍將蘓  
佐明王嘉憲石定寬等二十八人飲酒帝方酣入室更  
衣殿上燭忽滅劉克明等謀反帝崩于室內時年十八  
諡曰睿武昭愍孝皇帝廟號敬宗陵曰莊陵

敬宗寶曆二年

欽定續通志卷十三

欽定四庫全書

欽定續通志卷十四

唐紀

十四

文宗

武宗

文宗皇帝諱昂穆宗第二子也母曰貞獻皇后蕭氏  
初名涵長慶元年封江王寶曆二年十二月敬宗崩  
劉克明等矯詔以絳王悟勾當軍國事壬寅內樞密  
使王守澄中尉梁守謙等率禁軍討賊誅之并殺

絳王乃迎文宗於江邸癸卯見羣臣於紫宸外廡  
下教處分軍國事以裴度攝冢宰羣臣三上表勸  
進乙巳皇帝即位於宣政殿更名昺丙午赴西宮  
成服丁未宰臣百寮上表請聽政三表許之道士  
紀處玄楊冲虛伎術人李元戢王信等並配流嶺  
南戊申尊母為皇太后己酉放鳳翔淮南所進女  
樂二十四人庚戌以韋處厚為中書侍郎同中書  
門下平章事丁巳為絳王舉哀廢朝三日庚申出

宮女三千人省教坊樂工技術冗員千二百七十人縱  
五坊鷹犬停貢纂組雕鏤金筐寶飾牀榻停諸司新加  
衣糧御馬坊場及近歲別貯錢穀所占陂田悉歸之有  
司

太和元年春二月乙巳大赦改元免京兆今歲夏稅之  
半賜九廟陪位者子孫及立功將士階爵有差三月壬  
戌右軍中尉梁守謙致仕以樞密使王守澄代之夏四  
月己未忠武軍節度使王沛卒庚申以太僕卿高瑀為

忠武軍節度使五月丙子以烏重胤為橫海軍節度使  
以前橫海節度副使李同捷為兗海沂密等州節度使  
加史憲誠同平章事六月癸巳以淮南節度使兼諸道  
鹽鐵轉運使王播為尚書左僕射同中書門下平章事  
依前充諸道鹽鐵轉運使以御史大夫段文昌為淮南  
節度使甲寅以旱降京畿死罪以下秋七月癸酉葬敬  
宗皇帝於莊陵李同捷反八月庚子削李同捷官爵命  
烏重胤王智興史憲誠李載義李聽等各帥本軍討之



復以張茂宗為充海沂密節度使辛丑邠寧節度使高  
崇簡卒壬寅以刑部尚書柳公綽為邠寧節度使九月  
癸亥以左神策軍將何文哲為鄜坊丹延節度使甲戌  
以左神策大將軍李泳為單于都護充振武麟勝節度  
使丙戌以諫議大夫蕭裕為桂管觀察使冬十一月丙寅  
烏重胤卒庚辰以保義軍節度使李寰為橫海軍節度  
使十二月庚戌以王智興為滄州行營招討使加同平章事  
二年春三月己卯王智興攻棣州焚其三門夏四月壬

午以邕管經畧使王茂元為容管經畧使六月辛巳以  
靈武節度使李進誠為邠寧節度使以天德軍使李文  
悅為靈武節度使秋七月辛丑史憲誠及李同捷戰於

平原敗之

舊書無此一條新書有之而於八月辛巳又複載之今去彼存此

王廷湊反

八月壬申義武軍節度使柳公濟與戰於新樂敗之已  
卯劉從諫敗之於臨城癸未又敗之於昭慶九月丁亥  
王智興拔棣州以李寰為夏州節度使甲午削王廷湊  
官爵命諸軍討之以前夏州節度使傅良弼為橫海軍

節度使庚戌安南軍亂逃其都護韓約冬十月庚申史

憲誠克平原

新書作史憲誠及李同捷戰於平原敗之而於下戊寅又載其語今據通鑑改輯

辛未以江西觀察使李憲為嶺南節度使癸酉竇易直

罷以李逢吉為宣武軍節度使十一月乙酉以右金吾

衛大將軍李祐為橫海軍節度使壬辰給復棣州一年

十二月乙丑魏博行營兵馬使元志沼反

考異曰竇錄或作于志沼

或作元志沼或作元志紹舊紀作元志紹新紀傳作元志治今從之胡三省曰元若堅反元渠之反二音皆

姓也壬申韋處厚薨戊寅以翰林學士路隨為中書侍郎

同中書門下平章事

三年春正月元志召與王廷湊合兵掠貝州史憲誠告  
難詔滄州行營兵赴之庚子李聽擊敗之志召奔鎮州  
甲辰以太常卿李絳檢校司空兼興元尹山南西道節  
度使己酉以前山南西道節度使王涯為太常卿二月  
辛亥以兵部尚書崔羣為荆南節度使三月乙酉罷教  
坊日直樂人壬辰義武軍節度使柳公濟卒乙巳以太  
原兵馬使傅毅為義武軍節度使義武軍不受其兵馬使

張璠自稱節度使戊申以璠為節度使夏四月戊辰李祐克德州李同捷降乙亥滄德宣慰使柏耆斬之於將陵五月庚寅加李載義同平章事辛卯給復橫海軍四州一年丙申橫海軍節度使李祐卒以涇原節度使李岵為齊德等州節度使改名有裕丁酉以前義武軍節度使傅毅為橫海軍節度使辛丑以右金吾衛大將軍張惟清檢校司空充涇原節度使以左金吾衛大將軍劉遵古為邠寧節度使六月辛亥以魏博節度使史憲

誠檢校司徒兼侍中為河中尹充河中晉絳節度使以  
義成軍節度使李聽兼魏博節度使以魏博節度副使  
史孝章為相衛節度使甲戌魏博軍亂殺其節度使史  
憲誠兵馬使何進滔自稱留後秋七月李聽至魏州進  
滔出兵擊之聽大敗走歸滑州乙未嶺南節度使李憲  
卒丁酉以京兆尹崔護為嶺南節度使八月壬子詔以  
何進滔為魏博節度使復以相衛澶三州歸之癸丑以  
衛尉卿殷侑為齊德滄節度使辛酉以旱免京畿九縣

今歲租壬申赦王廷湊復其官爵甲戌以吏部侍郎李  
宗閔同中書門下平章事九月壬辰以兵部侍郎李德  
裕檢校戶部尚書兼義成軍節度使冬十一月甲午有  
事於南郊大赦禁獻難成非常之物焚絛布繚綾機杼  
乙巳以王智興守太傅進封鴈門郡王雲南蠻寇嵩  
二州十二月丁未發鄂岳襄鄧陳許等道兵伐之以劔  
南東川節度使郭釗為西川節度使仍權東川事庚戌  
雲南蠻寇成都府己未以右領軍大將軍董重質為神

策西川行營節度使蠻寇梓州壬戌寇蜀州乙丑以東  
都留守令狐楚為天平軍節度使己巳郭釗奏蠻兵退  
辛未以太子少師李聽為邠寧節度使

四年春正月丙戌以左神策大將軍丘直方為鄜坊節  
度使戊子封子永為魯王辛卯以武昌軍節度使牛僧  
孺為兵部尚書同中書門下平章事癸巳以前邠寧節  
度使劉遵古為劍南東川節度使甲午王播薨辛丑以  
尚書左丞杜元穎為武昌軍節度使二月乙卯興元軍亂



殺其節度使李絳庚申以左丞溫造為興元節度使辛  
未夏州節度使李寰卒壬申以董重質為夏綏銀宥節  
度使三月乙亥以河東節度使李程檢校左僕射同平  
章事兼河中尹晉絳慈隰等州節度使以刑部尚書柳  
公綽為太原尹北都留守河東節度使丁丑以前河中  
節度使薛平為太子太保癸卯以淮南節度使段文昌  
檢校尚書左僕射同中書門下平章事兼江陵尹荆南  
節度使以前太子賓客崔從為淮南節度使夏四月丁

未奚寇邊李載義擊敗之五月丁丑以旱命京城諸司  
慮囚六月丁未以守司徒門下侍郎平章事裴度為司  
徒平章軍國重事秋七月癸未尚書右丞宋申錫同中  
書門下平章事八月戊辰幸梨園亭會昌殿奏新樂九  
月壬午以裴度充山南東道節度使冬十月戊申以東  
都留守崔元畧為義成軍節度使以李德裕為成都尹  
劔南西川節度使甲寅以前劔南西川節度使郭釗為  
太常卿十一月癸巳以左丞康承宣為充海沂密等州

節度使十二月己酉崔元畧卒壬子以左金吾衛大將軍段凝為義成軍節度使閏月壬申太常卿郭釗卒

五年春正月庚申幽州軍亂逐其節度使李載義兵馬使楊志誠自稱留後載義赴京師二月壬辰以為守太保同中書門下平章事丙申以桂管觀察使李諒為嶺南節度使三月庚子貶宋申錫為太子右庶子癸卯降封漳王湊為巢縣公再貶宋申錫為開州司馬夏四月己丑以李載義為山南西道節度楊志誠為幽州盧龍

節度使六月戊寅以霖雨詔諸司慮囚秋八月庚午武昌軍節度使元稹卒壬申以河陽三城節度使楊元卿為宣武軍節度使以李逢吉檢校司徒充東都留守以溫造為河陽三城懷州節度使九月李德裕奏收復吐蕃所陷維州冬十月戊寅蠻寇蘄州十一月己未以王承元檢校司空充平盧軍節度使癸亥以尚書左僕射竇易直檢校司空為鳳翔隴右節度使

六年春正月壬子降死罪以下甲寅司徒薛平卒二月

甲子以前義昌軍節度使殷侑為天平軍節度使以令狐楚為太原尹北都留守河東節度使戊寅以蘇湖二州水發米二十二萬石賑之三月辛丑以王智興兼侍中充忠武軍節度使以李聽為武寧軍節度使以金吾衛大將軍孟友亮為邠寧節度使辛酉以前忠武軍節度使高瑀為武寧軍節度使夏四月戊寅以新除武寧軍節度使李聽為太子太保五月甲辰西川修邛崃關城又移雋州於臺登城丁巳以鹽州刺史王晏平為靈

鹽節度使庚申給疫死者棺十歲以下不能自存者糧  
秋七月癸丑以李文悅為充海沂密節度使己未以戶  
部尚書判度支王起為河中晉慈隰節度使八月辛酉  
吏部尚書崔羣卒九月庚寅淄青初定兩稅額五州一  
十九萬三千九百八十九貫自此淄青始有上供壬子  
以右金吾衛將軍史孝章為鄆坊丹延節度使冬十月  
甲子立魯王永為皇太子

按舊書通鑑皆在十月甲子  
新書作十一月甲子十二月

有乙丑則十一月不應  
有甲子當是十月也

壬午以左金吾衛將軍李昌言

為夏綏銀宥節度使十一月丁未淮南節度使崔從卒

乙卯以荊南節度使段文昌為劔南西川節度使十二

月乙丑牛僧孺罷丁未以前西川節度使李德裕為兵

部尚書

此據舊書然舊書是月己未朔歷乙丑戊辰乙亥不得又有丁未疑有誤也

七年春正月壬辰罷吳蜀冬貢新茶甲午加劉從諫同

平章事乙亥以太府卿崔珙為嶺南節度使

此據舊書然乙亥不

應在甲午之下又舊書上年十二月己未朔則此正月

當是己丑朔而書乙丑且若是己丑朔則是月中不得又有乙亥壬子賑京兆府粟十萬石河南府河中府絳

州各七萬石同華陝虢晉等州各十萬石甲寅以新除  
嶺南節度使崔珙為武寧軍節度使以右金吾衛將軍  
王茂元為嶺南節度使二月丙戌兵部尚書李德裕同  
中書門下平章事三月辛卯楊志誠執春衣使邊奉鸞  
及送奚契丹使尹士恭己亥嶺南節度使李諒卒癸卯  
以京兆尹杜悰為鳳翔隴右節度使夏四月癸亥前鳳  
翔節度使檢校司空竇易直卒五月丁酉以李聽為鳳  
翔隴右節度使六月乙巳以李載義為太原尹北都留守



河東節度使乙亥李宗閔罷己卯以右神策大將軍李  
用為邠寧節度使秋七月丁亥以右龍武統軍康志睦  
為四鎮北庭行軍涇原節度使壬寅以尚書右僕射諸  
道鹽鐵轉運使王涯同中書門下平章事領使如故乙  
己以左丞楊嗣復為劍南東川節度使己酉以旱命諸  
司慮囚癸丑以左僕射李程檢校司空兼宣武軍節度  
使甲寅以旱徙市宋申錫卒詔許歸葬閏月乙卯以旱  
避正殿減膳徹樂出宮女千人縱五坊鷹犬停修造事

非急務者八月庚寅降死罪以下賜文武及諸州府長  
官子為父後者勲兩轉戊申以刑部尚書高瑀為忠武  
軍節度使九月甲寅以前忠武軍節度使王智興為河  
中尹河中晉絳慈隰節度使冬十一月己卯以左神策長  
武城使朱叔夜為涇原節度使十二月癸卯天平軍節度  
使王承元卒丁未以河南尹嚴休復為平盧軍節度使  
八年春二月壬午朔日有食之庚寅以疾愈降囚罪放  
逋賦移流人三月庚午以裴度充東都留守依前守司

徒兼侍中丙子以華州刺史崔戎為充海觀察使夏四月丙戌詔笞罪母鞭背六月甲午以旱詔諸司慮囚丙申以前鳳翔節度使杜棕為忠武軍節度使秋九月庚申右軍中尉王守澄宣召鄭注對於浴堂門賜錦彩銀器冬十月辛巳幽州軍亂逐其節度使楊志誠兵馬使史元忠自稱留後庚寅以山南西道節度使李宗閔為中書侍郎同中書門下平章事壬辰召國子四門助教李仲言對於思正殿賜緋甲午李德裕罷以李仲言為

翰林侍講學士丙午以新除興元節度使李德裕為兵  
部尚書十一月辛亥以左金吾衛大將軍蕭洪為河陽三  
城節度使癸丑以禮部尚書王源中為山南西道節度  
使成德軍節度使王廷湊卒軍中奉其子元逵知留後  
乙亥以李德裕檢校右僕射充鎮海軍節度使丙子李  
仲言請改名訓十二月己卯以昭義節度副使鄭注為太  
僕卿降京畿死罪以下癸未以通王為幽州盧龍節度  
使以史元忠為留後

此通王當是德宗子通王諱  
然舊書不書其名恐有誤

九年春正月乙卯以王元逵為成德軍節度使太常卿  
庾承宣為天平軍節度使癸亥巢縣公湊薨追封齊王  
壬申司徒李逢吉卒二月甲申以司農卿王彥威為平盧  
軍節度使三月丙辰以史元忠為盧龍節度使丁巳劔南  
節度使段文昌卒庚申以楊嗣復為成都尹西川節度使  
乙丑以歲饑賜魏博六州粟五萬石陳許鄆曹濮等  
州各二萬石夏四月丙戌以桂管觀察使李從易為嶺  
南節度使以李德裕為太子賓客分司東都丙申路隨

罷戊戌以新浙西觀察使賈餗為中書侍郎同中書門下平  
章事庚子貶李德裕為袁州長史五月戊辰以尚書右  
丞王璠為戶部尚書判度支辛未王涯冊拜司空癸酉以  
河中節度使王智興為宣武軍節度使六月乙亥以前宣  
武軍節度使李程為河中節度使丁亥以右神策大將  
軍劉沔為涇原節度使壬辰貶李宗閔為明州刺史秋  
七月辛亥以御史大夫李固言為門下侍郎同中書門  
下平章事壬戌鎮海軍節度使路隨卒戊辰以刑部尚

書殷侗為天平軍節度使以吉州刺史裴泰為邕管經  
畧使八月甲戌以戶部侍郎李翱為山南東道節度使  
丁丑以太僕卿鄭注為工部尚書充翰林侍講學士郾  
坊節度使李章為義成軍節度使甲申以左神策大將  
軍趙儋為郾坊節度使九月乙卯以涇原節度使劉沔為  
振武麟勝節度使庚申以鳳翔節度使李聽為忠武軍  
節度使癸亥殺陳宏志丁卯李固言罷以翰林侍講學士  
工部尚書鄭注檢校右僕射充鳳翔隴右節度使戊辰

以右軍中尉王守澄為左右神策觀軍容使兼十二衛  
統軍已巳以御史中丞舒元與為刑部侍郎翰林學士  
李訓為禮部侍郎並同中書門下平章事壬申以刑部郎  
中兼侍御史知雜事李孝本權知御史中丞冬十月乙亥杜  
悰復為陳許節度使李聽為太子太保分司王涯獻權茶  
之利乃以涯為權茶使以吏部尚書令狐楚為左僕射  
以刑部尚書鄭覃為右僕射辛巳殺王守澄癸未以前  
廣州節度使王茂元為涇原節度使己亥以前河陽節



度使蕭洪為鄜坊節度使庚子裴度進位中書令餘如  
故十一月乙巳殺武寧軍監軍使王守涓丙午以大理  
卿郭行餘為鄆寧節度使丁巳以戶部尚書判度支王  
璠為太原尹北都留守河東節度使戊午以京兆尹李  
石為戶部侍郎判度支以京兆少尹羅立言權知府事  
己未以太府卿韓約為左金吾衛大將軍壬戌李訓及  
王璠郭行餘鄭注羅立言李孝本韓約等謀誅中官不  
克訓奔于鳳翔甲子以尚書左僕射鄭覃同中書門下

平章事乙丑以戶部侍郎李石同中書門下平章事左神策軍中尉仇士良捕殺李訓王涯賈餗舒元興李孝本羅立言王璠郭行餘鳳翔少尹魏逢皆族誅之丁卯以左神策大將軍陳君奕為鳳翔節度使戊辰鳳翔監軍使張仲清殺其節度使鄭注己巳仇士良殺韓約十二月壬申殺左金吾衛將軍李貞素翰林學士顧師邕丙子以刑部尚書王源中為天平軍節度使丁丑降京師死罪以下

開成元年春正月辛丑朔日有食之

按舊書云丙辰望日有蝕之歷法日食在

朔月食在望望安得有日食舊書誤

大赦改元免太和五年以前逋負京

畿今歲稅賜文武官階爵丁未以銀州刺史劉源為夏

綏銀宥節度使二月昭義軍節度使劉從諫表請王涯

等罪名丙申加從諫檢校司徒夏四月癸酉以亳州刺

史裴弘泰為義成軍節度使甲午以山南西道節度使

李固言為門下侍郎同中書門下平章事以左僕射令

狐楚為山南西道節度使閏五月甲申以河中節度使

李程為左僕射判太常卿事乙酉以李聽為河中節度使己丑以神策大將軍魏仲卿為朔方靈鹽節度使六月癸亥以河南尹李紳為宣武軍節度使秋七月辛未以左金吾衛將軍傅毅為鄆坊節度使癸酉宣武軍節度使王智興卒辛卯以刑部尚書殷侑為山南東道節度使甲午以金吾衛大將軍陳君賞為平盧軍節度使九月庚辰詔復宋申錫官爵冬十二月丙申以京兆尹薛元賞為武寧軍節度使庚戌以華州刺史盧鈞為嶺

南節度使癸丑以兵部侍郎楊汝士為劍南東川節度使  
二年春三月丙寅以彗星見減膳壬申素服避正殿徹  
樂降死罪流已下原之縱五坊鷹犬禁京畿採捕甲戌  
以左僕射李程為山南東道節度使己丑以金吾大將  
軍李直臣為邠寧節度使夏四月戊戌以工部侍郎陳夷  
行同中書門下平章事庚申太原節度使李載義卒五  
月乙丑以東都留守裴度為太原尹北都留守河東節  
度使丙寅以浙西觀察使李德裕為淮南節度使辛未

以前淮南節度使牛僧孺檢校司空東都留守六月丙午河陽軍亂逐其節度使李泳戊申以左金吾衛將軍李執方懷為河陽三城懷州節度使秋七月乙亥以久旱徙市閉坊門乙酉以蝗旱詔諸司慮囚八月庚戌封敬宗皇帝子休復為梁王執中襄王言揚杞王成美陳王封子宗儉為蔣王

杞王舊紀作記王傳又作紀王此從新書

冬十月癸卯宰

臣判國子祭酒鄭覃進石壁九經一百六十卷刊碑列於太學戊申李固言罷十一月壬戌以太子賓客分司

東都殷侑為忠武軍節度使丁丑興元節度使令狐楚卒丁亥以刑部尚書鄭澣為山南西道節度使

三年春正月甲子盜擊李石詔大索京城丁卯追贈齊王湊為懷懿太子戊辰以諸道鹽鐵轉運使戶部尚書

楊嗣復戶部侍郎李珣並同中書門下平章事

此日新舊書及

通鑑皆作戊申然上有丁卯下有丙子則非戊申可知此據宰相表

丙子李石罷夏五月

乙亥禁諸道奏祥瑞其朝享宮廟及元日受朝所奏皆停秋七月甲子以衛尉卿王彥威為忠武軍節度使右

金吾衛大將軍史孝章為邠寧節度使九月壬戌移太子於少陽院殺太子宮人左右數十人辛未義武軍節度使張璠卒其子元益自稱留後壬申以易州刺史李仲遷為義武軍節度使冬十月乙酉李仲遷至定州不得入壬辰以右金吾衛將軍高霞寓為夏綏銀宥節度使庚子皇太子暴薨乙巳以左金吾將軍郭昉為邠寧慶節度使十一月壬戌降死罪已下滄州節度使李彥佐為鄆曹濮節度使以德州刺史劉約為義昌軍節度



使丁卯張元益去定州壬申以蔡州刺史韓威為義武軍節度使十二月辛丑以河東節度使裴度守司徒中書令以兵部侍郎狄兼謨為河東節度使

四年春閏正月甲申以吏部侍郎鄭肅為河中晉絳慈隰等州節度使丙申以前河中節度使李聽為太子太保二月辛酉以吏部侍郎歸融為山南西道節度使三

月丙戌司徒中書令裴度薨

裴度之死新紀不書而傳係之開成三年考白居易

有和裴令公三月上巳日游太原龍泉憶去歲禊洛之作是開成三年詩則度實以四年死新傳以為三年誤

也宰相表載度于三年十二月為中書令却不誤  
茲據舊書又舊紀是日係丙申茲則改從通鑑云 夏

四月壬子以右羽林統軍李昌元為廊坊節度使五月  
丙申鄭覃陳夷行罷丙午邠寧節度使郭旼卒六月辛  
亥以長武城使符徹為邠寧節度使秋七月壬寅以河  
南尹韋長為平盧軍節度使甲辰以太常卿崔鄴同中  
書門下平章事八月癸亥以左僕射牛僧孺檢校司空  
同平章事充山南東道節度使九月甲辰以京兆尹鄭  
復為劍南東川節度使冬十月丙寅立陳王成美為皇

太子丁丑太子太保李聽卒十一月己亥曲赦京城繫囚  
五年春正月戊寅帝不豫己卯左右神策軍護軍中尉  
魚弘志仇士良立潁王漙為皇太弟權勾當軍國事廢  
皇太子成美復為陳王辛巳皇帝崩於太和殿年三十  
三謚曰元聖昭獻皇帝廟號文宗陵曰章陵

文宗太和九年開成五年凡十四年

武宗皇帝諱炎穆宗第五子也母曰宣懿皇后韋氏始  
封潁王本名漙累加開府儀同三司檢校吏部尚書開

成五年正月文宗疾甚宰相李珣楊嗣復面奉旨以皇太子監國兩軍中尉仇士良魚弘志以太子之立功不在已乃言太子幼且有疾更議所立遂矯詔迎潁王於十六宅立為太弟辛巳即皇帝位于柩前楊嗣復攝冢宰癸未殺陳王成美安王溶及賢妃楊氏甲午追尊穆宗妃韋氏為皇太后二月乙卯大赦庚申開府右軍中尉仇士良封楚國公左軍中尉魚弘志封韓國公夏五月己卯楊嗣復罷以刑部尚書崔珙同中書門下平章

事

舊書在二月此據新書及通鑑

秋八月壬戌葬文宗皇帝于章陵庚

午李瑀罷義武軍亂逐其節度使陳君賞君賞討誅之  
九月甲戌以淮南節度使李德裕為吏部尚書同中書  
門下平章事尋兼門下侍郎以宣武軍節度使李紳為  
淮南節度使召道士趙歸真等入禁中於三殿修金籙  
道場帝親受法籙冬十月魏博節度使何進滔卒其子重  
霸自稱留後

會昌元年春正月辛巳有事於南郊大赦改元三月甲

戌以御史大夫陳夷行為門下侍郎同中書門下平章

事

舊書在開成五年七月此據新書及通鑑

夏六月以何重霸為天雄軍節

度使仍賜名重順秋九月癸巳盧龍軍將陳行泰殺其

節度使史元忠自稱留後閏月牙將張絳殺行泰自稱

主軍務雄武軍使張仲武起兵討絳冬十月以仲武知盧

龍留後仲武尋克幽州

考異曰舊紀十月幽州雄武軍使張絳言行泰據唐蹟以鎮軍

加討許之是月誅行泰以絳知兵馬事二年正月以絳知留後仍賜名仲武以兩人為一人誤也

十一

月癸亥崔鄆罷

二年春正月以張仲武為盧龍節度使己亥李德裕進位司空回鶻寇天德及振武軍二月丙寅太子太師蕭俛卒丁丑以淮南節度使李紳為中書侍郎同中書門下平章事

舊書紀傳  
俱在元年

三月以振武節度使劉沔為太原

尹北京留守河東節度使夏四月丁亥羣臣上尊號曰仁聖文武至神大孝皇帝大赦賜文武官階勲爵五月戊申回鶻盟沒斯降太子太師鄭覃卒六月陳夷行罷秋七月以尚書右丞李讓夷為中書侍郎同中書門下

平章事八月回鶻寇大同川九月詔發河東盧龍振武之師以劉沔為回鶻南面招撫使張仲武為回鶻東面招撫使李思忠為河西党項都將西南面招撫使冬十月封子峴為益王岐宪王十一月獵於白鹿原十二月丙戌封子嶧為德王嵯昌王

三年春正月庚子天德軍行營副使石雄及回鶻戰於黑山敗之二月庚申朔日有食之甲戌崔珙罷夏四月乙丑昭義軍節度使劉從諫卒其弟之子稹自稱留後丁



亥以忠武節度使王茂元為河陽節度使邠寧節度使  
王宰為忠武節度使五月辛丑削劉從諫及劉稹官爵  
以成德軍節度使王元逵為澤潞北面招討使魏博節  
度使何弘敬為澤潞東面招討使與劉沔王茂元河中  
節度使陳夷行合兵進討壬寅以翰林學士承旨崔鉉  
為中書侍郎同中書門下平章事以武寧軍節度使李  
彥佐為晉絳行營諸軍節度招討使六月辛酉李德裕  
為司徒秋七月以山南東道節度使盧鈞為昭義軍節

度兼招撫使庚子免河東今歲秋稅九月辛卯以王  
宰兼河陽行營攻討使河陽節度使王茂元卒戊申以  
河南尹敬昕為河陽節度使庚戌以晉絳行營節度副  
使石雄為行營節度使冬十月己巳石雄及劉稹戰于  
烏嶺敗之以河東節度使劉沔檢校司空為義成軍節  
度使以荆南節度使李石檢校司空平章事兼太原尹  
北都留守河東節度使党項寇鹽州以前武寧軍節度  
使李彥佐為朔方靈鹽節度使十一月党項寇邠寧以

充王岐為靈夏六道元帥安撫党項大使御史中丞李  
回副之安南軍亂逐其經畧使武渾十二月丁巳王宰  
克天井關

四年春正月乙酉河東將楊弁逐其節度使李石壬子  
監軍使呂義忠討平之二月甲寅朔日有食之丁巳以  
河中節度使崔元式為太原尹北都留守河東節度使  
辛酉楊弁伏誅三月戊寅以劉沔為河陽節度使夏四  
月以左僕射王起同平章事充山南西道節度使六月

追削左軍中尉仇士良官爵己未令中書門下御史臺  
慮囚秋閏七月壬戌李紳罷以淮南節度使檢校司空  
杜悰為尚書右僕射兼中書侍郎同中書門下平章事  
仍判度支充鹽鐵轉運等使

杜悰入相通鑑從實錄  
在七月甲辰今從新書

丙

子昭義軍將裴問及邢州刺史崔嘏洺州刺史王釗磁  
州刺史安玉以城降八月乙未昭義軍將郭才殺劉稹  
以降進封何弘敬廬江郡公王元逵檢校司空進封太  
原郡公戊戌給復昭義軍五州一歲免太原河陽及懷

陝晉絳四州秋稅戊申李德裕為太尉進封衛國公河東  
節度使陳夷行卒九月以石雄為河中尹河中晉絳慈  
隰等州節度使以王宰檢校司空為太原尹北都留守  
河東節度使党項寇邊以子愕為開府儀同三司朔方  
軍節度使冬十月如鄠縣十二月獵于雲陽

五年春正月己酉朔羣臣上尊號曰仁聖文武章天成  
功神德明道大孝皇帝辛亥有事於南郊大赦賜文武  
官階勲爵文宣公二王三恪子一子出身作望仙臺于南

郊庚申義安皇太后崩夏五月壬戌杜棕崔鉉罷以戶部侍郎李回為中書侍郎同中書門下平章事秋七月丙午朔日有食之敕併省天下佛寺以山南東道節度使鄭肅檢校尚書右僕射同中書門下平章事八月壬午大毀佛寺復僧尼為民冬十月以衡山道士劉玄靜為銀青光祿大夫乙亥作昭武廟於虎牢關十二月如咸陽六年春二月癸酉以旱降京城死罪以下免今歲夏稅庚辰以夏州節度使米暨為東北道招討党項使壬辰

以邠寧節度使高承恭為西南面招討党項使三月壬戌帝不豫改御名曰炎帝藥發不能言左神策護軍中尉馬元贇立光王怡為皇太叔權勾當軍國政事甲子皇帝崩于大明宮年三十三謚曰至道昭肅孝皇帝廟號武宗陵曰端陵

武宗會昌六年

欽定續通志卷十四



欽定四庫全書

史部  
欽定續通志卷十八  
五至

主事臣尹壯圖覆勘

總校官原任侍講臣王燕緒

欽定四庫全書

欽定續通志卷十五

唐紀

宣宗

懿宗

宣宗皇帝諱忱憲宗第十三子也母曰孝明皇后鄭氏  
長慶元年封光王始名怡會昌六年三月武宗疾篤宰  
相請見不許諸宦官密於禁中定策立宣宗為皇太叔  
更名忱丁卯即皇帝位帝幼時宮中皆以為不慧太和

以後益自晦匿羣居游處未嘗發言文宗每如十六宅宴集好誘其言以為戲笑謂之光叔及是哀戚滿容裁決庶務咸當于理人始知其有隱德焉夏四月辛未尊母鄭氏為皇太后丙子李德裕罷杖殺道士趙歸真等流軒轅集於嶺南以成德軍節度使王元逵檢校太保山南西道節度使王起魏博節度使何弘敬淮南節度使李紳並檢校司空劍南西川節度使崔郾檢校尚書右僕射同中書門下平章事並如故五月乙巳大赦以

翰林學士承旨兵部侍郎白敏中同中書門下平章事

辛酉封子溫為鄆王涇雅王滋蘄王沂慶王

按諸王傳雅王涇大

中元年始王新書載於此年疑誤又按舊書此年無雍王漢而大中元年復不載封雅王事又夔王作蘄王均

有脫誤秋七月李讓夷罷淮南節度使李紳卒八月壬申

葬武宗皇帝於端陵九月鄭肅罷以兵部侍郎判度支

盧商為中書侍郎同中書門下平章事以荆南節度使

李德裕為東都留守冬十月甲申帝受三洞法錄於道

士劉玄靜

此據通鑑輯舊書於五月書誅劉玄靜蓋因杖殺趙歸真等致誤也

十一月以

江西觀察使周墀為義成軍節度使十二月戊辰朔日  
有食之

大中元年春正月甲寅有事於南郊大赦改元復左降  
官死者官爵賜文武官階勲父老帛文宣王及二王後  
三恪子一子官二月丁卯封弟惕為彭王惲棣王封  
子澤為濮王潤鄂王以李德裕為太子少保分司東  
都癸未以旱避正殿減膳徹樂出宮女縱鷹隼止營繕  
理京師繫囚三月盧商罷以刑部尚書判度支崔元式

為門下侍郎翰林學士承旨戶部侍郎韋琮為中書侍郎並同中書門下平章事閏月大復所廢佛寺夏四月積慶皇太后蕭氏崩五月張仲武及奚北部落戰敗之吐蕃寇河西王宰以代北諸軍擊敗之秋八月丙申李回罷冬十二月戊午貶李德裕為潮州司馬

二年春正月甲子羣臣上尊號曰聖敬文思和武光孝皇帝大赦賜文武官階勲爵宗子房未仕者予一人出身西川節度使李回責授湖南觀察使桂管防禦觀察

使鄭亞貶循州刺史追奪李紳告身夏五月己未朔日  
有食之崔元式罷以兵部侍郎判度支周墀刑部侍郎  
鹽鐵轉運使馬植並同中書門下平章事己卯太皇太  
后郭氏暴崩秋七月己巳續圖功臣於凌烟閣九月再貶李  
德裕為崖州司戶冬十一月韋琮罷

三年春正月丙寅涇原節度使康季榮奏吐蕃以秦原

安樂三州及石門等七關歸於有司

考異曰實錄涇原節度使康季榮奏

吐蕃宰相論恐熱殺東道節度使奉表以三州七關來降獻祖紀年錄亦云殺東道節度使奉表國史叙論恐

熱事甚詳至五年五月始來降此際未降也又不云殺東道節度使且恐熱若以三州七關來降朝廷必官賞之何故但賞邊將而不及恐熱蓋三州七關以吐蕃國亂自來降唐朝廷遣諸道應接之非恐熱帥以來實錄耳

詔靈武節度使朱叔明邠寧節度使張景緒各出本道兵應接之以太常卿封敖為興元尹山南西道節度使三月乙卯詔待詔官與刑法官諫官次對馬植罷夏四月乙酉周墀罷以御史大夫崔鉉為中書侍郎兵部侍郎判戶部事魏扶並同中書門下平章事盧龍節度使張仲武卒其子直方自稱留後五月武寧軍亂逐其



節度使李鄠以義成軍節度使盧弘止為武寧軍節度使討平之六月戊申以張直方為盧龍節度使康季榮奏收復原州及石門驛藏木峽制勝六盤石峽等六關秋七月丁巳朱叔明復安樂州甲子張君緒取蕭關甲戌鳳翔節度使李玘復秦州詔於蕭關置武州改安樂州為威州八月己丑帝御延喜門樓撫慰河隴老幼沒蕃復歸者共賜絹十五萬匹詔募百姓墾闢秦威原三州及七關土田五年不租稅鳳翔邠寧靈武涇原四鎮

將士能於鎮戍之地營田者官給牛及糧種其三州七  
關鎮戍之卒皆倍給衣糧仍二年一代劔南西川沿邊  
沒蕃州郡亦令量力收復冬十月西川節度使杜悰奏  
收復維州十二月甲戌以克復河湟追謚順宗曰至德  
弘道大聖大安孝皇帝憲宗曰昭文章武大聖至神孝  
皇帝

謹按通鑑輯覽

御批唐自肅代以後河西隴右盡沒吐蕃及是雖因蕃亂請  
降版籍徒隸強藩而田稅未歸司計則所云克復者亦虛  
有其名而已  
已未崖州司戶參軍李德裕卒於貶所以上二條  
俱據舊書

但舊書不繫日此據通鑑繫之然通鑑是月為閏十一月而甲戌已未相距四十五日是年又無十二月事當有誤  
山南西道節度使鄭涯奏收復扶州

四年春正月庚辰朔大赦夏四月壬申以霖雨詔京師  
關輔慮繫囚免度支鹽鐵戶部逋負六月戊申魏扶薨  
以戶部尚書判度支崔龜從同中書門下平章事八月

盧龍軍亂逐其節度使張直方兵馬使張允伸自稱留

後

考異曰實錄九月幽州大將表請押衙張允伸知留後事舊書允伸傳曰大中四年戎帥周琳寢疾表允

伸為留後朝廷可其奏按新書張允伸傳直方出奔以都知兵馬使為衆立為留後天子報可無周琳為留

後事故新書于三年十二月不載周琳為九月以河陽留後於此月亦不言允仲為周琳表薦也

三城節度使李拭為太原尹北都留守河東節度使冬十月辛未以翰林學士承旨令狐綯為兵部侍郎同中書門下平章事十一月党項寇邠寧十二月以李拭及

鳳翔節度使李業並兼招討党項使

新書李業作李安業

五年春二月以右諫議大夫李福為夏綏節度使三月以白敏中為司空充招討党項行營都統制置等使兼邠寧節度使夏四月敏中及党項戰敗之党項平辛未

給復邠寧鄜坊等道靈夏鹽三州三歲五月以李拭為  
鳳翔節度使李葉為太原尹北都留守河東節度使六  
月封子潤為鄂王秋七月宰相監修國史崔龜從續成  
柳芳唐歷二十二卷上之八月南山党項降冬十月沙  
州人張義潮以瓜沙伊肅鄯甘河西蘭岷廓十一州歸

于有司以義潮為瓜沙伊等州節度使

考異曰唐年補錄舊紀義潮降

在五年八月獻祖紀年錄及新紀在十月按實錄五年二月壬戌天德軍奏沙州刺史張義潮安景昊及部落使閻英達等上表請以沙州降十月義潮遣弟義澤以本道瓜沙伊肅等十一州地圖戶籍來獻河隴陷沒百

餘年至是悉復故地十一月建沙州為歸義軍以張義潮為節度使河沙等十一州觀察營田處置等使新傳三州七關降之明年三州首領張義潮奉十一州地圖以獻擢義潮沙州防禦使俄號歸義軍遂為節度使參考諸書蓋二月義潮使者始以得沙州來告除防禦使十月又遣義澤以十一州圖籍來上除節度使也新傳云三州降之

明年誤也

戊辰以戶部侍郎魏謩同中書門下平章

事白敏中罷都統十一月崔龜從罷以沙州置歸義軍以張義潮為節度使十二月盜斫景陵門戟

六年春正月戊辰以隴州防禦使薛逵為天雄軍使兼秦成階經略使夏四月甲辰以白敏中為劍南西川節

度使六月癸酉以刑部侍郎畢誠為邠寧節度使閏月  
庚子以太子少師盧鈞為河東節度使徙李業為義成  
軍節度使秋七月丙辰李珣卒八月甲子以禮部尚書  
諸道鹽鐵轉運等使裴休同中書門下平章事九月獠  
寇昌資二州

七年春正月戊申有事于南郊大赦夏五月左衛率府  
倉曹張戣集律令格式為刑法統類上之冬十月尚書  
左僕射崔鉉進續會要四十卷

八年春正月丙戌朔日有食之二月南蠻進犀牛還之  
三月以旱慮囚夏五月以戶部侍郎翰林學士承旨蘇  
滌為江陵尹荆南節度使秋八月以司農卿鄭助為夏  
綏銀宥等州節度使九月封子洽為懷王訥昭王汶康  
王

九年春正月甲申成德軍節度使王元逵卒其子紹鼎  
自稱留後二月甲戌崔鉉罷三月以吏部侍郎鄭涯為  
義武軍節度使夏閏四月辛丑禁嶺外民鬻男女者五



月丙寅以王紹鼎為成德軍節度使秋七月浙東軍亂  
逐其觀察使李訥以旱遣使巡撫淮南減上供饋運免  
逋租仍發粟賑之丙辰以尚書左僕射崔鉉為淮南節  
度使庚申罷淮南宣歙浙西冬至元日常貢以代下戶  
租稅九月以昭義軍節度使鄭涓為太原尹北都留守  
河東節度使乙亥貶李訥為朗州刺史監軍王宗景杖  
四十仍詔自後戎臣失律并監軍坐之

謹按通鑑輯覽

御批監軍理不應設直撤之可耳乃不懲掣肘之弊而轉定  
失律并坐之條是欲去其權而反加之權也非抱薪救火

何而

冬十一月以河南尹劉瑒為宣武軍節度使

十年春正月丁巳以御史大夫鄭朗為工部尚書同中書門下平章事秋九月封子灌為衛王冬十月以畢誠為昭義節度使桂管觀察使令狐楚卒戊子裴休罷十一月壬辰以戶部侍郎崔慎由為工部尚書同中書門下平章事

十一年春正月丙辰以京兆尹韋澳為河陽三城節度使以劍南西川節度使白敏中為江陵尹荆南節度使

二月以夏綏銀宥節度使鄭助為邠寧慶節度使以右金吾衛將軍田在賓為夏綏銀宥節度使辛巳魏謩罷夏四月以鳳翔節度使裴識為忠武軍節度使以吏部侍郎盧懿為鳳翔尹鳳翔隴右節度使壬申以右千牛衛大將軍宋涯為安南邕管宣慰使五月容管軍亂逐其經略使王球六月癸巳以涯為容管經略使甲午封子瀛為廣王秋七月庚子以兵部侍郎判度支蕭鄴同中書門下平章事八月成德軍節度使王紹鼎卒其弟

紹懿自稱留後以昭王汭為成德軍節度大使以王紹懿為成德軍副使留後以義武軍節度使鄭涯為宣武軍節度使以四鎮北庭行軍涇原渭武節度使盧簡求為義武軍節度使以鹽州刺史陸耽為涇原節度使九月以秦州刺史李承勛為四鎮北庭涇原渭武節度使以禮部侍郎杜審權為陝虢都防禦觀察使辛酉以太子太師盧鈞為檢校司空同中書門下平章事興元尹山南西道節度使冬十月壬申鄭朗罷遣中使迎道士

軒轅集于羅浮山以王紹懿為成德軍節度使十一月  
太子少師鄭朗卒十二月以畢誠為太原尹北都留守  
河東節度使以太子少保分司東都裴休為昭義軍節  
度使以刑部尚書蔣係為鳳翔尹鳳翔隴右節度使後  
十二年春正月以康王傅分司王式為安南都護經略  
使軒轅集至京師帝召入禁中留之月餘堅求還山以  
福州刺史楊發為嶺南東道節度使戊午以戶部侍郎  
劉瑑同中書門下平章事二月甲子朔廢穆宗忌日停

光陵朝拜及守陵宮人戊辰崔慎由罷三月鹽州監軍  
使楊元价殺其刺史劉臯夏四月庚子嶺南軍亂逐其  
節度使楊發戊申以兵部侍郎夏侯孜同中書門下平  
章事五月丙寅劉瑑薨庚辰湖南軍亂逐其觀察使韓  
琮辛巳以李承勛為嶺南節度使討亂者平之六月江  
西軍亂逐其觀察使鄭憲秋七月丙寅宣州都將康全  
泰逐其觀察使鄭薰八月以崔鉉兼宣歙觀察使冬十  
月康全泰伏誅以光祿卿韋宙為江西觀察使討亂者

誅之十二月甲寅以兵部侍郎蔣伸同中書門下平章事太子少保魏謩卒

十三年春正月戊午朔大赦免度支戶部逋負放宮人夏四月以左金吾大將軍田牟為武寧軍節度使五月帝不豫秋八月壬辰立鄆王溫為皇太子癸巳皇帝崩于咸寧殿年五十謚曰聖武獻文孝皇帝加謚元聖至明成武獻文睿知章仁神聰懿道大孝皇帝廟號宣宗陵曰貞陵

宣宗大中十三年

懿宗皇帝諱漼宣宗長子也母曰元昭皇后龔氏會昌六年五月封鄆王本名溫宣宗愛夔王滋欲立為皇太子而以非次故久不決大中十三年宣宗餌道士虞紫芝及山人王樂藥疽發於背八月疾甚宰相及朝士皆不得見宣宗密以夔王滋屬內樞密使王歸長馬公儒宣徽南院使王居方等而左神策護軍中尉王宗實副使元實排闥直入至寢殿則宣宗已崩東首環泣矣



宗實叱歸長等責以矯詔乃遣使迎鄆王壬辰下詔立  
鄆王為皇太子權勾當軍國政事更名淮收歸長公儒  
居方皆殺之癸巳宣遺詔以令狐絢攝冢宰丙申皇太  
子即皇帝位癸卯尊皇太后為太皇太后以王宗實為  
驃騎上將軍虞紫芝王樂及醫官李元伯皆伏誅九月  
庚申追尊暱昭容為皇太后冬十月辛卯大赦賜文武  
官階勳爵耆老粟帛以昭義軍節度使裴休為太原尹  
北都留守河東節度使以河中節度使畢誠為宣武軍

節度使十一月戊午蕭鄴罷十二月甲申以翰林學士承旨杜審權同中書門下平章事丁酉令狐綯罷以荆南節度使白敏中為司徒門下侍郎同中書門下平章事是歲雲南蠻陷播州

咸通元年春正月浙東人裘甫反觀察使鄭祗德戰于剡西敗績二月丙申葬宣宗皇帝於貞陵三月辛亥以前安南都護王式為浙東觀察使秋七月壬寅王式討裘甫平之封憲宗子沔為信王八月己卯裘甫伏誅以裴

休為鳳翔尹鳳翔隴右節度使以鳳翔節度使盧簡求  
為太原尹北都留守河東節度使冬十月安南都護李  
鄴復播州丁亥追復李德裕官爵己亥夏侯孜罷以戶  
部尚書畢誠同中書門下平章事十一月丁丑有事於  
南郊大赦改元十二月戊申雲南蠻寇安南癸亥福王  
綰為司空

二年春正月詔發邕管及鄰道兵救安南二月白敏中  
罷尚書左僕射判度支杜悰兼門下侍郎同中書門下

平章事福王綰薨夏六月癸丑以鹽州防禦使王寬為  
安南經略招討使秋七月蠻陷邕州八月以中書舍人  
衛洙為義成軍節度使九月蠻寇雋州遣神策將軍康  
承訓率禁軍及江西南湖之兵援之

三年春正月庚午朔羣臣上尊號曰睿文明聖孝德皇

帝大赦是月蔣伸罷

宰相表係己酉日己酉當在庚午之前考通鑑正月作庚寅朔則是

月不妨有己酉然於四月係己亥朔似正月又當是庚午朔也

二月庚子杜棕為司空

以湖南觀察使蔡襲為安南經略招討使三月戊寅張

義潮克涼州夏四月己亥詔于兩街四寺各置戒壇度人五月分嶺南為東西道以邕管經略使鄭愚為嶺南

東道節度兼觀察處置等使將軍宋戎為嶺南西道節

度使

按通鑑云蔡京奏請分嶺南為兩節度使從之以韋宙為東道節度使以蔡京為西道節度使京為

政苛慘遂為軍士所逐以觀察使鄭愚為嶺南西道節度使至四年七月以宋戎為經略使新書于三年九月亦云嶺南西道軍亂逐其節度使蔡京則鄭愚宋戎此時尚未為節度也鄭愚宋戎蔡京皆無傳可考惟韋宙傳云遷嶺南節度使南詔陷交趾撫兵積備以幹聞舊書云鄭愚宋戎為節度使疑誤

秋七月武

寧軍亂逐其節度使溫璋以浙東觀察使王式為武寧

軍節度使討誅之以前西川節度使夏侯孜為門下侍郎同中書門下平章事九月嶺南西道軍亂逐其節度使蔡京以戶部侍郎李晦為興元尹山南西道節度使冬十月丙申封子侑為魏王儋涼王佶蜀王杜悰為司徒十一月封順宗子緝為蘄王憲宗子愷為榮王蠻寇安南詔發荆南湖南兩道兵援之降囚罪免徐州秋稅四年春正月庚午有事于南郊大赦雲南蠻陷安南蔡襲死之庚辰撫王紘為司空以昭義軍節度使劉潼為太原

尹北都留守河東節度使二月謁十六陵

考異云  
拜十六

陵非一日可了而舊史無還宮之日唐年補  
錄云二月庚子一日拜十六陵尤難信也

以左散騎

常侍李荀為義成軍節度使三月以戶部侍郎李蟠為

昭義軍節度使夏四月畢誠罷以康承訓為嶺南西道

節度使五月戊辰以翰林學士承旨楊牧同中書門下

平章事戊子杜審權罷閏六月杜悰罷以兵部侍郎曹

確同中書門下平章事秋七月辛卯朔日有食之免安

南戶稅丁錢二歲弛廉州珠池禁八月以兵部尚書畢

誠為河中尹晉絳慈隰節度使加張允伸檢校司徒冬  
十二月蠻寇西川乙酉昭義軍亂殺其節度使沈詢

五年春正月以京兆尹李蟪為昭義軍節度使討亂者  
誅之蠻寇雋州二月己巳以刑部尚書李福同平章事

充成都尹劍南西川節度使

舊書此作牛叢又云徐州處置觀察防禦使語似不

倫考牛叢傳以乾符中為西川節度使新傳亦云咸通  
末拜西川節度使而李福傳則云蠻侵蜀拜西川節度  
使同平章事則通鑑于此作李福者是也  
惟鑑作刑部尚書與新傳作戶部者不同三月蠻寇邕

州康承訓與戰大敗更以捷聞加檢校右僕射夏四月



以兵部侍郎蕭賓同中書門下平章事五月丁酉詔瘞  
邕雋州死事者召募官健三千人赴邕管防戍事寧之  
後替還秋八月夏侯孜為司空以康承訓為右武衛大  
將軍分司以容管經略使張茵為嶺南西道節度使尋

以驍衛將軍高駢為安南都護本管經略招討使

舊書在四

月新書在四年  
二月此據通鑑

冬十月貞陵隧陷十一月乙酉以大同

軍防禦使盧簡方為義昌軍節度使戊戌夏侯孜罷壬

寅以翰林學士承旨路巖同中書門下平章事

六年春正月丁未以河東節度使孔溫裕為天平軍節  
度使丁巳始以懿安皇后配享憲宗廟三月蕭寘薨夏  
四月以前劍南東川節度使高瑒為兵部侍郎同中書  
門下平章事五月以石金吾大將軍李宴元為朔方節  
度使高駢及雲南蠻戰于邕州敗之六月庚戌高瑒薨  
以御史大夫徐商為兵部侍郎同中書門下平章事秋  
七月封子侃為郢王儼為普王

新舊書皆不載普王此據通鑑輯

九月

以吏部侍郎蕭倣為義成軍節度使冬十二月壬子太

皇太后鄭氏崩

七年春二月戊申免河南府同華陝虢四州一歲稅湖南岳州桂邕容三管夏秋稅之半三月戊寅以劉潼為劍南西川節度使成德軍節度使王紹懿卒其兄子景崇自稱留後加張允伸兼太保平章事進封燕國公以吏部侍郎鄭從謹為太原尹北都留守河東節度使閏月吐蕃寇邠寧秋八月王景崇起復充成德軍節度觀察留後冬十月張義潮遣其將拓跋懷光入鄆州擒吐

蕃大將論恐熱斬之傳首京師是月高駢克安南十一月壬子大赦免咸通三年逋負賜文武官階勲爵十二月以王景崇為成德軍節度使

八年夏五月丙辰以不豫降囚罪出宮人縱鷹鷂禁延

慶端午節獻女口楊收罷

新書在七年據傳云收自四年入相凡五年則當在是年茲從舊書

秋七月甲子以兵部侍郎于棕同中書門下平章事冬十一月辛丑以疾愈賜民瘼疾及戰傷者帛

九年春正月丙申以吏部侍郎李蔚為宣武軍節度使

加張允伸檢校太傅秋七月武寧軍節度糧料判官龐  
勛反于桂州劫庫兵北還九月戊戌以山南東道節度  
使盧耽為西川節度使冬十月庚午龐勛陷宿州丁丑  
陷徐州觀察使崔彥曾判官焦潞李稅溫延皓崔蘊韋  
廷乂死之十一月陷濠州刺史盧望回死之以右金吾  
大將軍康承訓為義成軍節度使徐州行營都招討使  
神武大將軍王晏權為北面招討使羽林將軍戴可師  
為南面招討使十二月龐勛陷滁州刺史高錫望死之

又陷和州戴可師與戰于都梁敗績死之王晏權兵屢

敗以泰寧軍節度使曹翔代之可師死以前天雄軍節

度使馬舉代之

此從新書考方鎮表沂海節度賜號泰寧軍在昭宗乾寧四年通鑑繫之僖宗

乾符三年而此已稱泰寧軍非也又天雄此時為秦州軍號馬舉蓋前為秦州軍使而通鑑於曹翔為招討下不

言馬舉招討即綴前天雄軍節度使何全皞之文夫全皞之繼鎮魏博當在十年乃新書及通鑑均繫之七年

又未他徙此何以有天雄節使之稱知通鑑尤誤也

十年春二月殺驩州流人楊收及鎮南軍節度使嚴譔

三月辛未徙封侃為威王夏四月康承訓及龐勛戰于

柳子寨敗之六月以神策軍將宋威為西北面招討使  
癸卯徐商罷以翰林學士承旨劉瞻同中書門下平章  
事秋九月龐勛伏誅冬十月戊戌免徐宿濠泗等州三  
歲稅役以徐州南面招討使權知淮南節度使馬舉為  
檢校司空兼淮南節度使徐州東南面招討使曹翔為  
徐泗濠團練防禦等使以康承訓為河東節度使同平  
章事以泗州刺史杜愔為義成軍節度使以沙陀三部  
落使朱邪赤心為大同軍節度使賜姓名李國昌魏博

節度使何弘敬卒其子全皞自稱留後

新書及通鑑俱在七年此據舊

書

十二月雲南蠻寇雋州又寇嘉州以蜀王佖為成都尹劍南西川節度使不出閤以盧耽知節度事何全皞起復檢校司空同平章事魏博節度使

十一年春正月甲寅朔羣臣上尊號曰睿文英武明德至仁大聖廣孝皇帝大赦以尚書右僕射杜審權為檢校司徒河中尹絳慈隰節度使辛酉貶康承訓為蜀王傅分公司東都再貶恩州司馬以河陽三城節度使崔彥



昭為太原尹北都留守河東節度使癸酉雲南蠻寇成都二月甲申西川節度副使王建立與戰于城北死之甲午東川節度使顏慶復敗之於新都乙未宋威以忠武軍至又大敗之庚子蠻兵遁去三月曹確罷夏四月丙午以翰林學士承旨韋保衡同中書門下平章事秋八月魏博軍亂殺其節度使何全皞其將韓君雄自稱留後九月庚戌以君雄為魏博留後丙辰劉瞻罷冬十月癸卯以西川留後吳行魯為節度使十一月辛亥以

禮部尚書王鐸同中書門下平章事以吏部侍郎鄭從  
謹為宣武軍節度使以李蔚為淮南節度使

十二年春正月盧龍節度使張允伸病請以子簡會為  
節度副大使權知兵馬事許之以韓君雄為魏博節度  
使夏四月癸卯路巖罷五月庚申慮囚帝如安國寺賜  
講經僧沉香高座秋七月以兵部尚書盧耽同平章事  
充山南東道節度使冬十月以兵部侍郎劉鄩為禮部  
尚書同中書門下平章事十二月以鄭從謹為嶺南東

道節度使

十三年春正月幽州盧龍軍節度使張允伸卒二月牙將張公素奪其留後張簡會軍政自稱留後丁巳于琮罷以刑部侍郎趙隱為戶部侍郎同中書門下平章事夏四月封子保為吉王傑壽王倚睦王五月乙亥殺國子司業韋殷裕以天德軍防禦使段文楚為雲州大同軍防禦使六月以張公素為盧龍軍節度使秋八月歸義軍節度使張義潮卒以沙州長史曹義金為歸義軍

節度使冬十月王鐸為司徒韋保衡為司空十二月徙振武軍節度使李國昌為大同軍防禦使國昌子克用

殺雲州防禦使段文楚據雲州自稱防禦留後詔以太

僕卿盧簡方為大同軍防禦使

按新書李克用殺段文楚冠遮虜軍在僖宗乾

符五年二月而沙陀傳又在乾符三年與紀互異考歐陽修五代史李國昌恃功益橫恣懿宗患之十三年徙國昌雲州刺史大同軍防禦使國昌稱疾拒命子克用殺段文楚據雲州自稱留後唐以盧簡方為振武節度使會幽并兵討之簡方行至鳳州軍潰由是沙陀侵掠代北為邊患矣明年僖宗即位以李鈞為靈武節度使以招輯之拜克用大同軍防禦使居久之國昌出擊党項既為赫連鐸襲破振武克用自雲州往迎國昌而雲

州人閉關拒之國昌父子無所歸因掠蔚朔得兵三千  
國昌入保蔚州克用還據新城僖宗乃拜鐸大同軍使  
李鈞代北招討使以討沙陀乾符五年沙陀破遮虜軍  
又破岢嵐軍而唐兵數敗沙陀由此益熾與舊書正同  
又按舊書咸通十四年克用既殺段文楚詔盧簡方招  
諭之國昌不奉詔自是沙陀侵掠代北諸軍鎮新書於  
咸通十四年正月亦云沙陀寇代北則殺段文楚當在  
十三年十二月也今從舊書備載於此而沙陀寇遮虜  
軍則仍依新書  
載於乾符五年 追諡宣宗為元聖至明成武獻文睿知

章仁神聰懿道大孝皇帝

十四年春正月沙陀寇代北辛未使盧簡方招諭之國  
昌不奉命詔太原節度使崔彥昭幽州節度使張公素以

師討之三月以新除大同軍使盧簡方為單于大都護  
振武節度使簡方行至嵐州卒癸巳迎佛骨于鳳翔夏  
四月壬寅佛骨至京師迎入禁中三日出置安國崇化  
寺大赦降中外繫囚五月丁亥西川節度使路巖兼中  
書令雲南蠻寇西川又寇黔南經略使秦匡謀棄城走  
六月乙未敕斬之王鐸罷秋七月帝不豫戊寅疾大漸  
庚辰立普王儼為皇太子權勾當軍國政事辛巳皇帝  
崩于咸寧殿年四十一諡曰睿文昭聖恭惠孝皇帝廟

號懿宗陵曰簡陵

懿宗咸通十四年

欽定續通志卷十五